



**INKULUMO KANGQONGQOSHE WEZOKUTHUTHA, UKUPHEPHA
NOKUXHUMANISA UMPHAKATHI KWAZULU-NATAL UMNUZ B.H. CELE
EMCIMBINI WOKUVULA IMIPHEME YEZITOBHI KWANONGOMA
NGOMGQIBELO MHLAKA 18 OCTOBER 2008**

Ngibanibingelela nonke

- KwaZulu-Natal naseNingizimu Afrika yonke, sisabhekene nesimo lapho ukuhlelwa kwamadolobha kwaphambilini bekungazihlinzeki ngokwenele izithuthi zomphakathi. Lona kusengumsebenzi omasipala bethu okumele bawubheke ekuhleleni ukusebenza kwezithuthi zomphakathi, ekuthuthukisweni kwengqalasizinda nasekusetshenzisweni komhlaba.
- Ngokwe-National Land Transportation Transition Act (NLTTA), ukuhlela nokufaka ingqalasizinda yezithuthi zomphakathi ngumsebenzi womasipala. Kodwa omasipala abancane abakwazi ukwenza lokhu ngenxa yokuntuleka kwamakhono.
- Kungakho-ke uMnyango wezokuThutha ubulokhu ulekelela ngezimali nobuchwepheshe kubo bonke omasipala kule minyaka yezimali edlule. Kodwa-ke lokho obekwenzeka bekuba ngukusiza ekuhleleni kungafiki ekwakheni uqobo.

- Kungalesi zathu uMnyango uthe awushintshe ungabe usagcina ngokusiza omasipala ekuhleleni kuphela kodwa ususiza nangokwakha uqobo kuleyo misebenzi ehlonzwe ngenkathi kuhlelwa.
- ImiKhandlu yeziFunda emithathu ehlonzwe njengokumele ihlomule kulokhu kwakhiwa kwengqalasizinda yezokuthutha umphakathi kulo nyaka wezimali: iZululand, Amajuba noMzinyathi.
- Namhlanje sivula ngokomthetho imipheme engu-30 eyakhiwe kuMasipala waKwaNongoma ngaphansi kwesiFunda iZululand. Ukwakhiwa kwale mipheme kudle imali engu-R4 million.
- Umgomo kaHulumeni wethu uthi uma kwakhiwa kumele imali isale kubantu bendawo. Ngakho-ke kuyajabulisa ukuthi nalapha bekusebenza abantu bendawo ngenkathi kwakhiwa.
- Le ngqalasizinda ifakazela ukuzibophezela kwethu njengohulumeni, ekwakhiweni kohlelo lwezokuthutha umphakathi oluphephile, olusebenza kahle, noluthembekile oluhambisana ngokuphelele nezidingo zabantu bakithi.
- Ukuvulwa nokuphendulwa kwamasoyi engqalasizinda esikwenzayo esifundazweni sonke kufakazela kona ukuthi ngempela sinomsebenzi obalulekile esibhekene nawo wokuguqula izimpilo zabantu baKwaZulu-Natal.
- Ngithanda ukugcizelela ukuthi uma siletha le misebenzi sikwenzela umphakathi ngaphandle kokubheka ukuthi ngowaliphi iqembu lepolitiki.

- Sesiyazi ukuthi kwezinye izindawo kukhona abasebenzisa ubuqembu ekuletheni izidingo. Njengomphakathi kumele ningavumi ukusetshenziswa ngosopolitiki nezisebenzi zikahulumeni ezisebenzisa ubuthaka benu ukuzihlomulisa zona kwezepolitiki.
- Ngenkathi kungena uhulumeni wentando yeningi ngo-1994, inselelo esibhekane nayo akubanga nje ukulungisa ukungalingani kwaphambilini kuphela, kodwa kudingeke sibhekane nezinsalelo ezilethwa ubugebengu, ingculazi, ububha, ukuntuleka kwemisebenzi nokunye. Yingakho sibe sesizibekela umgomo wokuthi senze impilo engcono kubantu bonke.
- Nokho-ke, impilo engcono ayikwazi ukuvele iqhamuke ngaphandle kwesisekelo. Kumele isekeleke ngaphansi kwezimo ezithile okuwuxolo, intando yeningi nentuthuko.
- Sengiphetha, ngithanda ukuninxusa njengomphakathi ukuthi niyigade ingqalasizinda yenu. Ningayicekeli phansi ngoba nazi ukuthi ngekahulumeni. Phela njengabakhokhi bentela, yinina enikhokhela ingqalasizinda yenu.
- Njengohulumeni sizoqhubeka nokwenza konke okusemandleni ukusiza imiphakathi yakithi kulezi zinsalelo ebhekene nazo ezindaweni zayo.

Ngiyabonga